

Churf. Meinzischen Mundtkochs. CLXXX

5. Nimb Rosenwasser vnd Zucker/vnd nimb Nüz/wenn man sie vom Baum bricht/thu sie auff/vnd schel den Kern/ laß mit Zucker wider auffsie- den/das der Sirup fein dick wirdt. Nimb ein außgestochen Oblat/ der fein rundt vnd eines Talers breit ist/thu die Nüz mit dem Sirup darauff/vnd laß kalt werden/so stehet es zierlich vnd schön.
6. Weichsel Confect mit Wasser/das die Brüh fein dick wirt/vnd die Weichsel außgesetzt neben einander in eine Schüssel / geuß die Brüh ober die Weichsel/vnd laß kalt werden. Du kanstz auch wol eynmachen in ein runde Schachtel/vnd die brüh oben darüber giessen/dz die stengel fein ober- sich gehen/es sey in der Schüssel oder in der Schachtel/so ist es auch gut.
7. Amarellé Confect in ein Schüssel oder in ein Schachtel eyn gemacht.
8. Muscateller Birn Confect/mit Zucker vnd Wasser eyn gemacht/ seind auch gut.
9. Nimb Datteln/vnd schneidt sie voneinander/vnd thu die Kern her- auß/vnd laß auffsieden mit Zucker/vnd ein wenig Rosenwasser/sez es auß/ vnd laß kalt werden/so ist es zierlich vnd gut.
10. Nimb Nüz/die nicht zeitig seind/mit der Schalen/die ein drey Wo- chen geweicht seyn/sez in Wasser auff/vñ laß sieden/biß sie ein wenig weich werdē/in geläutertem Zucker/vnd laß damit fein gemacht auffsieden/zeuchz auß in eine Schüssel/vnd laß kalt werden/vnd geuß nicht viel Sirup darü- ber/denn sie seind vorhin süß.
11. Nimb geläuterten Zucker/vnd laß in sieden / biß er dick wirt / thu Grosselbeer darein / vnd laß einen starcken Sudt mit auffthun / schütz ge- schwindt in ein Schüssel mit dem Sirup / vnd laß kalt werden / so ist es gut zu geben auff einen Tisch.
12. Nimb geläuterten Sirup/ der wol dick ist/vñ thu Erdbeer darein/laß geschwind darmit auffsieden/richt sie in eine schüssel an/ vñ laß kalt werden.
13. Nimb Mandeln / die weiß vnd wol geweicht seind in kaltem Was- ser/schneidt sie fein lenglicht vnd dün/nimb kleine Rosen darvnter/ die sau- ber außgewaschen seyn/wirff sie in Sirup/der dick gesotten ist/ vnd laß wol darmit sieden. Thue es auß auff ein Oblat/ das fein rund außgestochen ist/ vnd laß es fein kalt werden/so ist es gut vnd zierlich.
14. Auch Zirbelnüssen Kern Confect / wie man die Mandel Confect auff ein Oblat macht.

15. Hasel